



UPA 2017/026-01

23-05-2017

Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. xx, xx. xxx 2017-imeersoq.

Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaattut siunnersuut Partii Naleraq sinnerlugu imannak oqaaseqarfigissuarput.

Siunnersuutip siunertaa tunggaviatigut Partii Naleraq tamakkiisumik taperserparput, tassa namminersortut ingerlatsiviisa aamma pisortat oqartussaaffiisa ataatsimoorussanik kalaallit sulisinnaasut maannamiit annertunerusunik piginnaaneqalernissaat qulakkiissallugu pisariaqarlunnarmat.

Aamma sapinngisamik najugaqavissut amerlanerpaat pitsaanerpaamik ilinniartutut imaluunniit sungiusaammik allatigullu sulisussatut suliffeqartarnissaat siuarsarniarlugu qulakkeerniarlugulu.

Taamaammallu aamma siunnersuut pisortat oqartussaaffiit aamma pisortat suliffeqarfiit pisussaaffinnik, inuiaqatigiinnullu kalaallinut ajunngitsumik ineriartortitseqataanissamut tungavileeqataasussaammat iluaraarput.

Kiisalu iluaraarput, siunnersuutip ilusilernera imarisaalu suleqatigiissitami Sulisitsisut kattuffiit, SIK-mit kommuneqarfinit aamma susassaartunit allanik peqataaffigineqarsimammat.

Tassami tusarniaanermi apeqqutit arlallit, sulisoqarnermut, ilinniartut inissaannik sanaartornissanut aningaasaliissutinut allarpassuarnullu tungasut uparuartorneqarsimasut tamaaliornikkut aamma suleqatigiissitami oqallisigineqarlutillu iluarsisassartai inatsisissatut siunnersuummut iluarsineqarsimammata.

Malunginiarparputtaaq; suleqatigiissitat pingaartumik innersuussutigingaasut suliffeqarfiit pisortat tamanut ammasumik sulisussarsiuussinnermi namminersortut ilinniartunik sungiusaammillu

sulisussanik allanik qularnaarunneqartassasut. Taamaattumillu aamma tamanna tunngavigalugu pisortat suliassanik suliariumannittussarsiuussisut piunasaqarfigineqartut, kommunit pisortallu suliffeqarfii tamanut ammasumik suliariumannittussarsiuussinermi, kapitali 7 aamma 8 tunngavigalugit pisortat suliassanik suliassiisuusut tamanut ammasumik suliariumannittussarsiuussinermik ingerlatsinissaannik pisussaaffilerneqassasut.

Isumaqarpugut kalaallit suliffeqarfiutaat tamarmik pisortat suliassaataasa suliariumannittussarsiuunneqartarneranni peqataatinneqartalernissaat periarfissarsiuunneqartariaqartoq, tassami taakkuummata kalaallinik ilinniartunik amerlanerpaanik sulisoqartartut.

Nalunngilarput ukiuni tulliuuttuni sanaartungassarpasuit, mittarfiliorerit il.il. suliarineqartussaasut, taamaattumik Partii Naleqqamiit piunasaaraarput, suliassanut tamakkununga kalaallinik amerlanerpaanik sulisoqarnissaq ilinniartoqarnissarlu qulakkeerneqartariaqartoq.

Kiisalu isumaqarpugut kalaallit atorfillit, sulisartut, ilinniartut allallu ataatsimeersuartinneqartariaqartut, kalallinik sulisoqarnerulernissamut ilisimasat piunasaqaatit il.il. annerusumik paasisaqarfiginissaat anguniarlugu.

Inatsisissatut siunnersuummi suliffeqarfiit danskit naalagaaffiata nunatsinni ingerlataannut atuutsinneqannginnissaat naapertuussorinngilarput, inuiaqatigiinni danskit suliffeqarfiutaasa nunatsinniittut akisussaaqataannissaat pisariaqartut isumaqaratta.

Isumaqarpugut suliffeqarfiit allat tamaasa maani nunqavissunik ilinniartoqarnissaannik piunasaqarfigereerlugit danskit naalagaaffiata ataani suliffeqarfiit maani ingerlataqartut aamma piunaffigissallugit pissusissamisuuinnartoq. Soorlu aamma danskit suliffeqarfii taamatut ingerlataqareersut.

Taama naatsumik oqaaseqarluta siunnersuut tunngaviatigut taperserlugu suliap aappassaanneerneqannginnerani ataatsimiititaliami susassaartumik suliarineqarnissaa inassutingaarput.

Anthon Frederiksen